

同里志卷之六

典制志

風俗

奢靡淳厚相習成風採風問俗者所當知也考古十五國之風隨俗轉移同里去縣治十里得無有各安其俗者乎志風俗

里中自古遵樸素尙文學多詩禮之家比他鎮爲蔚自宋迄今故科第不絕儒風不衰云

成婚行親迎禮與城中同新人綵輿俗名花花轎里中迎娶必經太平吉利二橋以爲佳讖

成婚之禮大略與城中同唯奠雁禮男家備飯糲兩只紅紙封口名曰喜纏內裝金磚兩塊紅紙密封魚肉各一米

少許迎娶畢男女兩家掌禮收去卽城中雞魚肉麪禮也

有喪之家開喪受弔奢儉不同或用擇日或卽於小殮之明日城中必擇單日里中不拘單雙其餘略同

新喪作佛事世俗同風未入殮前延僧在家設壇誦經懺名曰入木功德向惟郡中有之今里中亦有此風每於

未殮前夜間用女尼在家誦經咒至天曉始散大槩皆周親所薦名曰記念

元旦至初五日仁濟道院懸掛十八羅漢像不異城南三天門遊人竟日不絕名曰數羅漢

同里志

卷六風俗

一

正月十五日吉祥菴預祝文昌帝君聖誕是日里中紳士拈香恭拜名曰文昌會以文章司命四字挨次輪當起於前明迄二百餘年香火不絕文風不替

上元佳節翊靈神院張燈結綵笙歌喧沸至夜半始散名曰燈會有公項九方輪存生息每年五月初一交盤

上元前後農民張錦燈穿錦衣騎紙馬執紙旗裝演故事鳴鑼擊鼓中有龍燈或一或二三鱗甲蜿蜒青白相間街

坊串鬪名曰串馬燈村庄市鎮極其喧鬧

三月二十八日爲天齊聖帝誕辰玉清洞真觀士女進香遊人擁擠闕塞衢路是日農民駕農船張旗幟鳴鑼擊鼓舞刀弄槊飛棹往來謂之快船

五月十三日爲關聖帝君誕辰羅星洲賽會士民進香往來擺渡起於國初里中衆姓及周陸王顧徐五姓輪流司會歌曰卯酉衆姓辰戌周巳亥陸宅遞輪流子午王家丑未顧寅申徐氏六年週

六月二十三日爲火德星君誕辰是日里中水龍齊集渡船菴前互相試驗觀者如堵

七月十五日僧舍悉營齋供招人薦亡名曰孟蘭盆會集善菴仁仁堂結壇放燄以供餓殍

八月初六日爲里域明王誕辰土地堂笙歌燈綵極其華盛

八月初七初八兩日爲昭靈廣佑王暨夫人誕辰南觀北觀兩處城隍廟笙歌燈綵極盛神前陳設俱借巨室古玩

互相誇耀

八月十五夜斗壇諸菴焚斗禮佛士女極盛

中秋前後里中燃觀音燈昇平橋兩岸最爲繁盛

重九日里人攜朋載酒或登西阪菴滌慮樓或登羅星洲酒仙閣拈題分韻各成詩篇竟日始散有古人龍山嘉會之遺風焉

冬至前一夕俗謂冬至夜里中最重是節有懸祖先神像於中堂至明日親友往來馳賀卽所謂冬至大如年是也十二月廿四日送竈菓品內俗用糖元寶謂取膠牙之意有於廿三日送竈或有官三民四之分除夕祀竈先供竈神於殿中謂之煖竈至正月初三日始謂之接竈

同里志

卷六風俗